

Misi balas dendam tertunai

■ KUALA LUMPUR 20 OGOS

AIR mata kegembiraan mengiringi pasukan bola jaring kebangsaan apabila berjaya 'menebus dendam' dengan mudah menjinakkan Singapura 65-41 dalam perlawanan akhir yang berlangsung di Stadium Juara, Bukit Kiara hari ini.

Detik yang cukup membanggakan itu sekali gus mengubati kekecewaan tumpas tipis 43-46 dua tahun lalu dengan kejayaan di laman sendiri ternyata menjadi penawar terbaik buat semua pemain negara setelah mempamerkan aksi terpuji dalam semua perlawanan.

Dalam aksi final itu, penyerang (GS) negara, An Najwa Azizan dilihat bertindak cemerlang di bahagian hadapan, selain dibantu gerakan pantas yang direncana pemain di bahagian tengah, Pow Mei Foong dan Nur Fariha Abdul Razak.

Tidak dinafikan juga sumbangan besar dan aksi hebat daripada penjaga gol (GK), Siti Nor Forhana Mustafa mengesang GS handalan Singapura, Charmaine Soh Shi Hui daripada mencipta jaringan.

Melihat aksi bertenaga pasukan kebangsaan dengan mendahului 20-7 pada suku pertama perlawanan, jurulatih



FAKTA
65-41

Malaysia berjaya 'menebus dendam' kekecewaan tumpas tipis 43-46 dua tahun lalu

ATLET bola jaring Malaysia dengan megah mempamerkan pingat emas yang diraih selepas berjaya menjinakkan juara bertahan Singapura pada perlawanan akhir di Stadium Juara, Bukit Kiara, Kuala Lumpur, semalam. - BERNAMA

Singapura, Yeo Mee Hong meletakkan GK tinggi lampai mereka, Shina Teo Xue Na di bahagian serangan bagi bergandingan dengan Shi Hui pada suku kedua perlawanan.

Namun formasi tersebut dilihat masih gagal menandingi keghairahan anak didik Stacey Robinson untuk memburu

kejuaraan.

Malah kebangkitan pasukan negara semakin menjadi dengan kemasukan pemain tinggi lampai negara, Norashikin Kamal Zaman yang bergandingan dengan Karishma S. Loganathan di suku ketiga.

Malaysia akhirnya mengesahkan kemenangan dan memperoleh emas yang dijamin apabila menamatkan

perlawanan mendebarkan dengan kemenangan selesa.

Kemeriahan aksi perlawanan akhir itu turut disaksikan oleh Perdana Menteri, Datuk Seri Najib Razak dan isteri, Datin Seri Rosmah Mansor.

Hadir sama memberi sokongan kepada pasukan kebangsaan ialah Menteri Belia dan Sukan, Khairy Jamaluddin.